

Na osnovu članova 78. , 79. , 80. , 81. i 85. a u vezi sa članom 48. stav (2) Zakona o visokom obrazovanju Kantona Sarajevo („Službene novine Kantona Sarajevo“, broj: 33/17), članom 116. a) Statuta Univerziteta u Sarajevu, prethodne saglasnosti Ministarstva za obrazovanje, nauku i mlade Kantona Sarajevo za raspisivanje Konkursa broj: 11/05-38-15203-2/19 od 30. 04.2019. godine i Odluke Vlade Kantona Sarajevo o broju i strukturi kandidata koji se mogu upisati na prvu godinu stručnog studija na Univerzitetu u Sarajevu u studijskoj 2019./2020. godini broj: 02-05-18393-48/19 od 25.04.2019. godine, Univerzitet u Sarajevu o b j a v l j u j e

**KONKURS
ZA UPIS KANDIDATA U PRVU GODINU STRUČNOG STUDIJA NA
UNIVERZITETU U SARAJEVU
U STUDIJSKOJ 2019./2020. GODINI**

Konkurs se raspisuje za upis u prvu godinu stručnog studija u studijskoj 2019./2020. godini, koji se organizira na fakultetima i akademijama Univerziteta u Sarajevu (u daljnjem tekstu: organizacione jedinice).

Terminološko korištenje muškog ili ženskog roda u ovom konkursu podrazumijeva uključivanje oba roda.

Prijave na Konkurs za upis podnose se organizacionim jedinicama u dva prijavna roka:

- Prvi prijavni rok od 07. juna do 05. jula 2019. godine
- Drugi prijavni rok od 26. avgusta do 13. septembra 2019. godine.

Visina participacije cijena usluga i školarina Univerziteta u Sarajevu, te fakulteta i akademija u njegovom sastavu utvrđena je Odlukom Vlade Kantona Sarajevo o davanju saglasnosti na visinu participacije cijena usluga, upisnina i drugih troškova studija Univerziteta u Sarajevu, te fakulteta i akademija u njegovom sastavu („Službene novine Kantona Sarajevo“, broj: 19/09, 31/12, 36/12, 4/15, 15/15, 16/18 i 21/18) i Odlukom o dopuni Odluke o davanju saglasnosti na visinu participacije cijena usluga, upisnina i drugih troškova studija Univerziteta u Sarajevu, te fakulteta i akademija u njegovom sastavu broj: 02-05-24155-16/18 od 07.06.2018. godine.

Studenti iz kategorije djece šehida i poginulih boraca, djece ratnih vojnih invalida, djece dobitnika ratnih priznanja i odlikovanja i djece bez oba roditelja oslobođeni su plaćanja troškova upisnine i školarine.

OPĆE ODREDBE

U prvu godinu studija u studijskoj 2019/2020. godini kandidati se upisuju u skladu sa planom upisa studenata.

Pravo učešća na Konkursu pod jednakim uvjetima imaju:

- državljani Bosne i Hercegovine i strani državljani sa završenom srednjom školom u četverogodišnjem trajanju u Bosni i Hercegovini;
- kandidati koji su srednju školu završili izvan Bosne i Hercegovine, a za koje je nakon postupka priznavanja odnosno ekvivalencije utvrđeno da imaju završeno adekvatno obrazovanje za nastavak školovanja;
- kandidati sa završenom srednjom školom u četverogodišnjem trajanju po međunarodnim programima koji su odobreni od nadležnog ministarstva.

Kandidati koji su srednju školu završili izvan Bosne i Hercegovine imaju pravo učešća na Konkursu i prije izvršenog priznavanja odnosno ekvivalencije svjedočanstva o završenom srednjoškolskom obrazovanju u inozemstvu. Ukoliko ovi kandidati prilikom predaje dokumentacije za upis nisu izvršili ekvivalenciju svjedočanstva, organizaciona jedinica je dužna zaprimiti ostalu dokumentaciju i uključiti kandidata u postupak za upis prema odredbama člana 85. Zakona o visokom obrazovanju Kantona Sarajevo („Službene novine Kantona Sarajevo“, broj: 33/17), u kojem se navodi da se kandidat koji ispunjava uvjete konkursa, a nalazi se na rang-listi kandidata koji su položili prijemni ispit u okviru odobrene kvote studenata za upis na tu organizacionu jedinicu, može uvjetno upisati u prvu studijsku godinu prije izvršene ekvivalencije svjedočanstva, uz prezentiranje potvrde da je postupak ekvivalencije po njegovom zahtjevu u toku i da kašnjenje u donošenju odgovarajućeg rješenja nije rezultat njegovog propusta koji mu se može staviti na teret.

Kandidate sa završenom srednjom školom po međunarodnim programima koji su odobreni od nadležnog ministarstva, a čiji se rezultati međunarodne provjere znanja objavljuju u augustu ili septembru, organizaciona jedinica je dužna uključiti u postupak za upis i prije izdavanja dokaza o položenim ispitima. Bodovanje uspjeha ovih kandidata se vrši na osnovu predviđenih ocjena (forecast grades) koje daju predmetni profesori, uz obavezu dostavljanja sertifikata i/ili diplome prije početka studijske godine. Kandidate sa ocjenom A*, A, B i C iz stranog jezika organizaciona jedinica je dužna osloboditi obaveze polaganja tog stranog jezika ako je isti uvjet za upis na odgovarajući studijski program.

Prijem i upis kandidata u prvu godinu studija provodi posebna komisija koju imenuje vijeće organizacione jedinice.

Izbor kandidata vršit će se na osnovu Odluke o kriterijima i mjerilima za utvrđivanje redoslijeda prijema kandidata za upis studenata u prvu godinu studija na organizacione jedinice Univerziteta u Sarajevu, koja je sastavni dio ovog konkursa, kao i pojedinačnih kriterija utvrđenih za vrednovanje ocjena iz predmeta relevantnih za odgovarajući studijski program i vrednovanja rezultata prijemnih ispita ukoliko su predviđeni.

Prijemni ispit vršit će se testom ili drugom pisanom formom u ovjerenom duplikatu, od čega jedna kopija ostaje organizacionoj jedinici, a druga kandidatu.

Organizacione jedinice će na svojim web stranicama/oglasnim pločama dati potpune informacije o mjestu i vremenu predaje dokumenata za prijavne odnosno upisne rokove.

Univerzitet i organizacione jedinice obavezni su da prije upisa kandidata u studijsku godinu na javan i transparentan način, objavom na svojoj web stranici/oglasnoj ploči, upoznaju sve kandidate sa pravilima studiranja, nastavnim planom i programom, te titulom i stručnim zvanjem koje se stječe nakon završetka studija.

DOKUMENTI POTREBNI ZA PRIJAVU NA KONKURS

Za prijave na Konkurs za upis u prvu godinu studija kandidat je dužan predati original ili ovjerenu kopiju sljedećih dokumenata:

- zahtjev za upis u kome je tačno naznačen odsjek na koji konkurira,
- svjedočanstva o završenim razredima srednje škole završene u Bosni i Hercegovini u četverogodišnjem trajanju odnosno odgovarajuće priznate dokumente za kandidate koji srednju školu nisu završili u Bosni i Hercegovini (ukoliko su dokumenti u postupku ekvivalencije, prilaže se potvrda da je postupak ekvivalencije u toku)
- diplomu o završenoj srednjoj školi,
- izvod iz matične knjige rođenih,
- uvjerenje o državljanstvu i
- druge dokumente relevantne za utvrđivanje broja bodova po kriterijima.

Prijave podnesene poslije utvrđenog roka kao i nepotpune prijave neće se uzimati u razmatranje.

PRIJAVNI I UPISNI ROKOVI

Prijave na Konkurs za upis podnose se organizacionim jedinicama u dva prijavna roka:

- Prvi prijavni rok od 07. juna do 05. jula 2019. godine
- Drugi prijavni rok od 26. avgusta do 13. septembra 2019. godine.

Organizacione jedinice na kojima je predviđen prijemni ispit će na svojim oglasnim pločama i web stranicama objaviti termine, raspored, sadržaj i način polaganja prijemnog ispita, kao i termine objave rezultata prijemnog ispita za svaki prijavni rok.

Preliminarnu rang-listu svih primljenih i prijavljenih kandidata organizacione jedinice će objaviti na oglasnoj ploči nakon što je verificira komisija koju imenuje vijeće, najkasnije dva dana od dana polaganja prijemnog ispita, a za organizacione jedinice na kojima se prijemni ispit ne polaže – najkasnije dva dana nakon isteka roka za podnošenje prijave na odgovarajući upisni rok konkursa.

Na preliminarnu rang-listu kandidati imaju pravo prigovora u roku od tri dana od dana objave iste, o kojoj je vijeće organizacione jedinice obavezno donijeti odluku u roku od tri dana. Nakon isteka žalbenog roka organizaciona jedinica objavljuje konačnu rang-listu i vrši upis primljenih kandidata. Odluka vijeća je konačna.

Teološki fakulteti preliminarnu rang listu primljenih i prijavljenih kandidata te konačnu ranglistu upisanih kandidata objavljuju nakon provedenog specifičnog postupka za upis kandidata na teološki studij.

U roku od sedam radnih dana od dana objave konačne rang-liste (upisni rok) kandidat koji je ostvario pravo na upis je obavezan dostaviti originalne dokumente organizacionoj jedinici i izvršiti upis; u suprotnom smatra se da je odustao od upisa na studijski program za koji je aplicirao, a pravo upisa stiže sljedeći kandidat sa konačne rang-liste koji je ispunio uvjete za upis u statusu u kojem je aplicirao, do popunjavanja odobrene kvote. Nakon isteka roka od sedam radnih dana od objave, organizaciona jedinica objavljuje revidiranu konačnu rang listu (nakon sravnjenja stanja odustalih/upisanih/pomjerenih na listi) u roku od dva dana, a pravo upisa u narednih pet dana stižu sljedeći kandidati sa revidirane konačne rang-liste koji su ispunili uvjete za upis u statusu u kojem su aplicirali.

Kandidatima koji nisu primljeni organizacione jedinice omogućit će preuzimanje dokumentacije.

ODLUKA

O KRITERIJIMA I MJERILIMA ZA UTVRĐIVANJE REDOSLIJEDA PRIJEMA KANDIDATA ZA UPIS U PRVU GODINU STRUČNOG STUDIJA NA UNIVERZITETU U SARAJEVU U STUDIJSKOJ 2019./2020. GODINI

Član 1.

Ovom odlukom utvrđuju se zajednički kriteriji i mjerila za bodovanje i upis kandidata u prvu godinu stručnog studija na organizacionim jedinicama (fakultetima i akademijama) Univerziteta u Sarajevu u studijskoj 2019/2020. godini.

Terminološko korištenje muškog ili ženskog roda u ovom konkursu podrazumijeva uključivanje oba roda.

Član 2.

Rangiranje kandidata i prijem studenata u prvu godinu studija vršit će se u zavisnosti od broja bodova koje kandidat osvoji:

1. ukoliko je predviđeno polaganje prijemnog ispita, na osnovu:
 - općeg uspjeha,
 - uspjeha iz maternjeg jezika i pojedinih predmeta značajnih za odgovarajući studij,
 - uspjeha iz engleskog jezika (ukoliko se nastava organizuje na engleskom jeziku)
 - rezultata postignutih na prijemnom ispitu,
 - rezultata ostvarenih na takmičenjima iz predmeta relevantnih za određeni studij i
 - odličan (5,0) uspjeh iz svih nastavnih predmeta i primjerno vladanje u toku cjelokupnog srednjoškolskog obrazovanja.

2. Ukoliko nije predviđeno polaganje prijemnog ispita, na osnovu:
 - općeg uspjeha,
 - uspjeha iz maternjeg jezika i pojedinih predmeta značajnih za odgovarajući studij,
 - uspjeha iz engleskog jezika (ukoliko se nastava organizuje na engleskom jeziku)

- rezultata ostvarenih na takmičenjima iz predmeta relevantnih za određeni studij i
- odličan (5,0) uspjeh iz svih nastavnih predmeta i primjerno vladanje u toku cjelokupnog srednjoškolskog obrazovanja.

Član 3.

Broj bodova po osnovu općeg uspjeha iznosi maksimalno 20, a utvrđuje se tako što se prosječna ocjena iz svih predmeta u svim razredima, zaokružena na dvije decimale, pomnoži sa 4.

Član 4.

Broj bodova po osnovu uspjeha iz predmeta značajnih za odgovarajući studijski program i rezultata postignutih na prijemnom ispitu utvrđuje se kako slijedi:

1. Ukoliko je predviđeno polaganje prijemnog ispita, na osnovu:
 - uspjeha iz maternjeg jezika, odnosno engleskog jezika (ukoliko se nastava organizuje na engleskom jeziku) i grupe predmeta koji su značajni za odgovarajući studij, vrednuje se sa maksimalno 40 bodova i to tako što se prosječna ocjena iz grupe ovih predmeta zaokruži na dvije decimale i pomnoži sa 8,
 - rezultata postignutih na prijemnom ispitu, vrednuje se sa maksimalno 40 bodova.
2. Ukoliko nije predviđeno polaganje prijemnog ispita, na osnovu:
 - uspjeha iz maternjeg jezika, odnosno engleskog jezika (ukoliko se nastava organizuje na engleskom jeziku) i grupe predmeta koji su značajni za odgovarajući studij, vrednuje se sa maksimalno 80 bodova i to tako što se prosječna ocjena iz grupe ovih predmeta zaokruži na dvije decimale i pomnoži sa 16.

Član 5.

Vrednovanje rezultata na osnovu uspjeha postignutog na prijemnom ispitu, kao i spisak predmeta značajnih za odgovarajući studijski program iz kojih se polaže prijemni ispit i način bodovanja po ovom osnovu, organizacione jedinice će istaći na svojim oglasnim pločama i web stranicama.

Član 6.

Za jedno od osvojenih mjesta na lokalnom (općinskom, gradskom) takmičenju učenika srednjih škola dobija se sljedeći broj bodova:

- za osvojeno prvo mjesto – 2 boda,
- za osvojeno drugo mjesto – 1 bod i
- za osvojeno treće mjesto – 0,5 bodova.

Za jedno od osvojenih mjesta na kantonalnom takmičenju učenika srednjih škola dobija se sljedeći broj bodova:

- za osvojeno prvo mjesto – 3 boda,
- za osvojeno drugo mjesto – 2 boda i
- za osvojeno treće mjesto – 1 bod.

Za jedno od osvojenih mjesta na takmičenju učenika srednjih škola na nivou entiteta i Bosne i Hercegovine dobija se sljedeći broj bodova:

- za osvojeno prvo mjesto – 4 boda,

- za osvojeno drugo mjesto – 3 boda i
- za osvojeno treće mjesto – 2 boda.

Za jedno od osvojenih mjesta na međunarodnom takmičenju učenika srednjih škola dobija se sljedeći broj bodova:

- za osvojeno prvo mjesto – 5 bodova,
- za osvojeno drugo mjesto – 4 boda i
- za osvojeno treće mjesto – 3 boda.

Ukupan broj bodova, a koje kandidat dobija po osnovu takmičenja navedenih u ovom članu, formira se na osnovu zbira bodova po svim rezultatima, s tim da se boduju rezultati ostvareni na takmičenjima iz predmeta relevantnim za određeni studij.

Za tehničke fakultete, pored navedenog, boduju se i rezultati u okviru takmičenja pod nazivom „Smotra tehničkog stvaralaštva”, koje je organiziralo Ministarstvo za obrazovanje, nauku i mlade Kantona Sarajevo.

Za kandidate iz država nastalih raspadom bivše SFRJ za bodovanje ostvarenih rezultata na takmičenjima primjenjivat će se odredbe utvrđene u stavovima 1, 2. i 3 ovog člana, uz primjenu principa ekvivalencije (lokalno = općinsko, gradsko; kantonalno = županijsko/regionalno, regije unutar države; entitetsko = pokrajinsko i ostalo; državno = državno).

Član 7.

Kandidatima koji su imali odličan (5,0) uspjeh iz svih nastavnih predmeta i primjerno vladanje u toku cjelokupnog srednjoškolskog obrazovanja, dodjeljuje se dodatnih 5 (pet) bodova.

Kandidatima sa završenom srednjom školom u četvorogodišnjem trajanju po međunarodnim programima odobrenim od strane nadležnog ministarstva i koji su polagali međunarodnu provjeru znanja u toku sve četiri godine iz predmeta od značaja za studij, dodjeljuju se dodatni bodovi za svaki pojedinačni predmet po sljedećoj shemi:

- ocjena A* ili A – 3 boda,
- ocjena B – 2 boda i
- ocjena C – 1 bod.

Član 8.

Za organizacione jedinice Univerziteta u Sarajevu koje organiziraju prijemni ispit, način vrednovanja svakog pojedinačnog segmenta prijemnog ispita i minimalan rezultat koji je potrebno ostvariti za upis se utvrđuju posebnom odlukom o kriterijima organizacionih jedinica, a što će biti sadržano u oglasu koji objavljuju organizacione jedinice.

Član 9.

Postupak provođenja ove odluke vrši komisija koju imenuje vijeće organizacione jedinice.

Na organizacionim jedinicama na kojima se polaže prijemni ispit komisija je dužna da osigura tajnost ispitnog materijala i druge relevantne dokumentacije.

Nakon zbrajanja bodova, za svakog kandidata pojedinačno, po svim osnovama iz ove odluke, komisija sačinjava preliminarnu rang-listu svih kandidata i oglašava je na oglasnoj ploči.

Na objavljenju rang-listu kandidati mogu uložiti pisani prigovor vijeću organizacione jedinice u roku od tri dana od dana objavljivanja preliminarne rang-liste.

Ukoliko kandidat ima prigovor na rezultate postignute na prijemnom ispitu, prigovor dokazuje ovjerenim duplikatom testa sa prijemnog ispita.

Vijeće organizacione jedinice dužno je da u roku od tri dana odluči o prigovoru kandidata i o tome ga obavijesti u pisanoj formi.

Odluka vijeća je konačna.

Konačni spisak primljenih kandidata u svim statusima, nakon što ga usvoji vijeće organizacione jedinice, organizaciona jedinica je obavezna objaviti na oglasnoj ploči najkasnije dva dana nakon isteka roka za donošenje odluke po izjavljenom prigovoru. Konačni spisak svih upisanih kandidata u svim statusima organizaciona jedinica je obavezna dostaviti Univerzitetu u Sarajevu najkasnije 10 dana prije početka studijske godine.

Član 10.

Kandidati koji, u skladu sa Konkursom, budu primljeni na odgovarajući studijski program, za upis u prvu godinu studija, pored već predatih dokumenata, podnose:

- upisni, semestralni list i ŠV-obrazac,
- upisnicu – indeks i
- podatke o zdravstvenom stanju – ljekarsko uvjerenje (izdaje ga Zavod za zaštitu zdravlja studenata Univerziteta u Sarajevu).

Kada se na jedinstvenoj listi kandidata, koji su po osnovu kriterija za upis studenata utvrđenih Odlukom Vlade Kantona Sarajevo broj: 11-01-14-19957-1 od 24. juna 2009. godine, u predviđenoj kvoti upisa nađe određeni broj kandidata iz država nastalih nakon raspada SFRJ, lista primljenih kandidata se proširuje za taj broj kandidatima državljanima BiH najviše do 4% kandidata u statusu za koji konkuriraju (redovni i redovni samofinansirajući).

Kada izračunati procent broja studenata u odnosu na maksimalno utvrđenu kvotu kandidata iz država nastalih nakon raspada SFRJ nije cijeli broj, u tom slučaju vrši se zaokruživanje procentualne vrijednosti u korist kandidata na sljedeći cijeli broj.

Ukoliko se na listi kandidata u kvoti do 4% nalazi više kandidata iz država nastalih nakon raspada SFRJ koji ostvare isti broj bodova, primaju se svi kandidati u statusu za koji konkuriraju, a lista se proširuje za taj broj kandidatima državljanima BiH.

Kada se na jedinstvenoj listi kandidata u predviđenoj kvoti upisa nađe određeni broj kandidata iz kategorije djece šehida i poginulih boraca, djece ratnih vojnih invalida, djece dobitnika ratnih priznanja i odlikovanja i djece bez oba roditelja, koje je organizaciona jedinica obavezna

osloboditi plaćanja troškova školarine, organizaciona jedinica ima pravo za broj kandidata koje oslobodi plaćanja školarine proširiti broj studenata koje upisuje u prvu godinu studija kandidatima koji ispunjavaju formalni uvjet za upis i to u statusu studenta koji plaća svoj studij.

Pod jednakim uvjetima iz ovih kriterija prednost imaju:

- djeca boraca-branitelja BiH,
- djeca ratnih vojnih invalida, djeca šehida i poginulih i nestalih boraca-branitelja i umrlih ratnih vojnih invalida,
- djeca organizatora otpora,
- djeca veterana-prvoboraca i
- djeca nosilaca najviših ratnih priznanja.

(čl. 1, 2, 5. i 24. Zakona o dopunskim pravima boraca-branitelja BiH, prečišćeni tekst („Službene novine Kantona Sarajevo“, broj: 45/12)

Član 11.

Invalidi sa utvrđenim stoprocentnim invaliditetom imaju pravo upisati se jedanput na određeni studijski program na Univerzitetu kao studenti budžetski finansiranih mjesta pod uvjetima:

- a) da su položili prijemni ispit,
- b) da su sposobni obavljati praktične zadatke u nastavi,
- c) da su stekli pravo upisa na odgovarajući stručni studij organizacione jedinice kao javne ustanove i
- d) da su dostavili dokaz nadležne institucije o statusu invalida i procentu invaliditeta.

Član 12.

Detaljnije informacije o mjestu i vremenu predaje dokumenata za upis, kao i druge relevantne informacije bit će objavljene na web stranicama/oglasnim pločama organizacionih jedinica.

**PLAN UPISA STUDENATA U PRVU GODINU STRUČNOG STUDIJA
NA UNIVERZITET U SARAJEVU U STUDIJSKOJ 2019./2020. GODINI**

Redni broj	NAZIV USTANOVE ODSJEK / STUDIJ	Predviđeno trajanje stručnog studija, godine i (E)CTS ^{a)}	BROJ STUDENATA					
			Redovni studij- troškove studija snosi osnivač	Redovni Studij ^{b)} - troškove studija snose sami studenti	Vanredni studij ^{c)}	DL studij ^{d)}	Strani državljeni	Ukupno
1.	FAKULTET ZA KRIMINALISTIKU, KRIMINOLOGIJU I SIGURNOSNE STUDIJE	2 120 (E)CTS	-	-	-	40	-	40
	Privatna sigurnost i zaštita od požara i eksplozija		-	-	-	40	-	40
2.	PRIRODNO- MATEMATIČKI FAKULTET	2 120 (E)CTS	-	80	-	-	-	80
	Odsjek za matematiku							
	Informacione tehnologije		-	80	-	-	-	80
3.	ELEKTROTEHNIČK I FAKULTET	2 120 (E)CTS	-	50	-	-	-	50
	Odsjek za Računarstvo i informatiku							
	Razvoj softvera		-	50	-	-	-	50
	UKUPNO UNIVERZITET SARAJEVU	U	-	130	-	40	-	170

Napomena:

Vlada Kantona Sarajevo saglasna je da Univerzitet u Sarajevu, u skladu sa interesom studenata i brojem raspoloživih mjesta, može vršiti preraspodjelu sa odsjeka/smjera na odsjek/smjer i sa jednog studijskog programa na drugi program, ali u okviru odobrenih kvota za fakultet.